

## KOLJSEDENJ

### *Sáabukpana kũ aduakenaao*

<sup>1</sup> Makũ Pɔlu, Kirisi Yesu z̄irri Luda pɔyenyĩnaa gũn kũ ó gbẽ Timotio, ókɔnɔ mé o takada dí kè

<sup>2</sup> ó gbẽ náanide kũ ò kú adona Kirisi gũn zaa Kɔlsenɔne. Luda ó De gbẽke keáre, à á gba aafiaa.

<sup>3</sup> Gɔɔ s̄inda pínki tó óten adua keáre, odiḡɔ Luda ó Dikiri Yesu Kirisi De sáabu kpáme,

<sup>4</sup> zaakũ o á Kirisi Yesu náanikena baaruu mà kũ yenyĩ kũ á v̄i ó gbẽnɔneeo n̄ pínki,

<sup>5</sup> kũ á wé dɔ pó kũ à ditenaáre ludambei yã. A yãpura yã mà zaa káaku baaru nna kũ o kpàáre gũn.

<sup>6</sup> Baaru nna pì ten né i àten dagula andunia gũn pínki, lákũ à kè á té nà zaa gɔɔ kũ a mà, akũ a Luda gbẽke súsu d̄è.

<sup>7</sup> Ó gbẽ yenyĩde ó z̄ikeri dake Epafara mé à yã p̄i dàáre ó ḡne ũ. Kirisi z̄ikeri náanideme,

<sup>8</sup> akũ mé à yenyĩ kũ Luda Nini á káa òwɛɛ.

<sup>9</sup> Abire yã zaa gɔɔ kũ o á baaruu mà, odiḡɔ wé keáre Ludaa lakanaa sari, de à tó à a pɔyenyĩna d̄ɔ swáswa, a Nini á gba òndɔ kũ wézeo pínki,

<sup>10</sup> de àḡɔ kun lákũ Dikiri yei nà, á yã s̄inda pínki káagu, de á yã mana s̄inda pínki kena ḡɔ dagula, á Luda d̄ɔna ḡɔ kara,

<sup>11</sup> de àḡɔ gbãna yã s̄inda pínki gũn a gbãna gakuride lén, de à pó s̄inda pínki f̄ɔ kũ menao kũ pɔnnao,

12 de àgõ De Luda sáabu kpá, zaakū à ó ká baka kū à òdite a gbēnōne gupuranwa.

13 À ó bó gusira ikon, à ó ká a Né mèn do yenyĩde kpatan.

14 A gāin o gõ zĩdadeno ũ, ó durunna kēwá.

*Kirisi de pó sīnda pínkila*

15 Kirisi bi Luda kū òdi e kū wéoro takame, Àkūme daudu ũ Luda pókēnānō té pínki.

16 Luda pó kū à kú musu kū zĩteoo kē pínki a gāi, pó kū òdi eno kū pó kū òdi erono, kpatablerinon yá ke dikirino ke gbānadeno ke ikodeno. Pó sīnda pínki bō a kīnaame, akūsō ò kun a pó ũ.

17 À kun pó sīnda pínki ā, pó sīnda pínki kun a gāime.

18 Àkūme sōsi gbē kū ò de a mē ũno mī ũ.

Àkūme naana ũ, gāvuvu káaku ũ, de à gõ pó sīnda pínki mīde ũ.

19 Zaakū à kà Ludagu a kíkē pínki pēkērea.

20 À tò pó sīnda pínki kē kāao nna a gāi, pó kū ò kú zĩte ke musunon yá. A aru kū à kòte lía mé à sù kú kēna nna pìio.

21 A kē Ludaa yā. A iberenon á ũ á laasun kū á vānikēnānō yāi,

22 akū Luda tò a kē kāao nna Kirisi gana a bisāsirikemēe gūn yāi sà, de à á kpan'are ke gbāsī sari, mamberu sari, taari sari,

23 tó á zēna gbāna á ludanaanikēnaa gūn yīgānaa sari gíngin, tó ádi kēkōa kū tāmaa kū á vī baaru nna kū a mēa gūnworō. Ò baaru nna pìi kpà gbē kū

Luda kè zĩte lanɔne pínki kũ makũ Pɔlu, ma gɔ̃ a kpàri ũ.

*Pɔlu zĩkena sɔsi gbɛnɔne*

<sup>24</sup> Tera sà maten pɔnna ke kũ wari kũ maten ke á yáio. Wari kũ Kirisi kè sɔsi gbɛ̃ kũ ò de a mè ũnɔ yáin maten pɔ kũ à gɔ̃ papa ma mèe gũn.

<sup>25</sup> Luda zĩ dàmenɛ, akũ ma gɔ̃ sɔsi gbɛ̃ pìnɔ kpanyĩri ũ. À ma zĩ mà a yã oáɛ papana.

<sup>26</sup> Asiriyã kũ à utena gbɛnɔne zaa káaku zaade Luda dí andunia kátero mé à bò Luda gbɛnɔne gupuraa sà,

<sup>27</sup> Luda ye ò dɔ̃ lákũ asiriyã pì gakuri zɔ̃kɔ̃ nà buri pãndenɔ kĩnaa. Asiri pìn dí: Kirisi kú á gũn, akũ á wé dɔ̃ gakuria.

<sup>28</sup> A waazin odì ke gbɛ̃ sĩnda pínkinɛ, odì lé daom̃ma, odì yã dao gbɛ̃ sĩnda pínkinɛ kũ òndɔ̃ sĩnda pínkio, de ò gé kũ baadio papana Luda arɛ Kirisi gũn.

<sup>29</sup> Abire yáí maten zĩ ke, maten kokari ke kũ a gbãna kũ àten zĩ ke ma gũnwo gbãnagbãna.

## 2

<sup>1</sup> Má ye àgɔ̃ kokari zɔ̃kɔ̃ kũ maten keáɛ dɔ̃, ákɔ̃nɔ kũ Laodiseadenɔ kũ gbɛ̃ kũ ódi wé sikɔ̃leronɔ pínki,

<sup>2</sup> de ñ swè le à kpáɛ, ò lédokɔ̃nɔ ke kũ yenyĩo, de ñ wé kè swáswa, ògɔ̃ Luda asiriyã kũ à de Kirisi pì ũ dɔ̃.

<sup>3</sup> A kĩnaan òndɔ̃ kũ dɔ̃naao aruzɛke sĩnda pínki ùten.

<sup>4</sup> Mateni abire oáɛ, de gbɛ̃ke sún á sãɛ kũ lénna lékpakɔ̃anaaoro yáí.

<sup>5</sup> Bee tó má kú kãáoro, ma nini kú kãáo, ma è áten yã ke a zéa, akũsõ á Kirisi náanikena gbãna, akũ ma pɔ kè nna.

*Pó s̄inda pínki pèkeremmana Kirisi gūn*

<sup>6</sup> Lákū a Kirisi Yesu s̄i á Dikiri ū nà, àgõ kú a gūn lɛ,

<sup>7</sup> á z̄ini gõ pɛtena a gūn. À kara a gūn, àgõ gbãna a náanikenaa gūn lákū ò dàáre nà. Àgõ kú kū sáabukpanaa manamana.

<sup>8</sup> À laakari ke de gbẽke sún d̄ona gbãna kasaáre à á s̄ate kū bisāsiri òndõ p̄a korioro. Yá bireno dì bo futɛokarayãno kū andunia yãkenano k̄inaame, adi ke Kirisi k̄inaanlo.

<sup>9</sup> Zaakū Luda k̄ike s̄inda pínki pèkere Kirisia a bisāsirikemɛe gūn.

<sup>10</sup> Kunna gbẽ kū à de gbãna s̄inda pínki kū iko s̄inda pínkioo m̄ide ū p̄i gūn, a s̄inda pínki pèkerɛáwa.

<sup>11</sup> A gūn a t̄õ z̄õ à bò á dà z̄in. Adi ke t̄õ kū bisāsiri dì z̄ín̄enlo, kū Kirisi dì z̄ín̄emɛ.

<sup>12</sup> Zaakū da'itekɛnaa gūn ò á v̄i k̄ao, akū a fute k̄ao, kū a gbãna kū Luda a fùteo bona gan náani kè ȳai.

<sup>13</sup> Á de ḡeno ū yá Luda k̄inaa á taarino kū á dà z̄ino ȳai, akū Luda á gbá w̄endi dufu lɛlɛ kū Kirisio, à s̄uruu kè k̄oo kū ó taarino pínki.

<sup>14</sup> Luda ó taari takada kū à ó dá ȳan gògo, à s̄è à pà lía.

<sup>15</sup> Kirisi gana lía gbãna s̄i dikirino kū gbãnadenooa, à bò k̄únwo sarapuraa à n̄ kpe bò, à n̄ kpan'are kè z̄iz̄ono ū.

16 Abire yāi àsun tó gbēke á taari e póblena ke pómína ke dikpe ke mo dufu bona ke kámmabogoro yā musuro.

17 Yā birenj pínki bi yā kũ ò pì ani su takame, yā pìnj bokotenan Kirisi ũ.

18 Àsun tó gbē kũ àdi a zīda busa éke pó ũ kũ àdi donyī ke malaikanene á sāte à á bo pó kũ á wé péanlo. Wégupu'ena yā mé àdigō gbāna gbē bire takane, akũ àdi a zīda bi pā a bisāsirikeda laasunjo yāi.

19 À pena Kirisi kũ à de mì ũaro. Kirisi gũn mēgu sīnda pínki dì kō kũ, ò nākōa kũ tīnj gbānao, mēe pìi digō gbā lākũ Luda ye à gbā nà.

20 Zaakũ a ga kũ Kirisio andunia yākenano musu, bōyāin adì n yāditennenano ma lán andunia gbēnj bàa?

21 Òdi pi, òsun adikīna na n ōiro, òsun adikīna í kero, òsun o na adiaro.

22 Pó birenj pínki dì láka kũ n anfānikenaao. Bisāsiri yādannenan abirenj ũ.

23 Yā birenj de lán ōndō yā bàme, zaakũ òdi donyī yā tilasi dañe kũ zīdabusanaao kũ waridona n zīda mēeao. Bee kũ abireo àdi kpá ó dānoro.

### 3

#### *Kunna wèndi dufu gũn*

1 Lākũ a fute kũ Kirisio nà, à tó ludambe yā doáre are, zaakũ gwen Kirisi vutena Luda oplai.

2 À tó á laasun gō kú ludambe yānoa, àsungō kú andunia pōaro.

3 Zaakũ a ga, á wèndi utena kũ Kirisio Luda gũn.

4 Lákū Kirisi de á wèndi ũ nà, tó à bò gupuraa, ákōnō se áni bo káao kū gakurio sà.

5 Abire yāi à andunia yā kū ò kú á nèsee gūnnō de: Pāpākenaa, wé'iyā, mēfutena, yā vāni nidena kū wākūuo. Pó kū gbē dì a wākū ke gōne a dikiri ũme.

6 Yā birenō yāin Luda ni pōfēna kipa a yāmarisarinōa.

7 Ákōnō se, á kú yā pìnō gūn yā, ò dòáre are.

8 À ò gbarē yā dí takanōi sà: Pōfēnaa, zukakanaa, nèse pāsī, gbēsōsōna kū yāpāpā'onaa.

9 Àsungō éke tokōnero, zaakū a á dà zī kū a yākenanō gòala,

10 a a dufu sè kū à kèke àten dufu kū de à gō lán a Kèri pò bà.

11 Gwe Yudanō kū buri pāndenō dokōnōme kū tōzōnadenō kū gyōfōrōdenō kū sēnte gbēnō kū wēsiradenō kū zōnō kū zīdadēnō. Kirisime n pínki ũ, à kú n gūn n pínki.

12 Abire yāi, lākū Luda á sé a gbē yenyīdenō ũ nà, dà kū ò de à daáwanōn dí: Wēnda, gbēke, zīdabusanaa, buseke kū menao.

13 À kō fō. Tó yāke sù à á ká kū kōo, à sùru ke kū kōo. Lākū Dikiri sùru kè kááo nà, à ke kū kōo le se.

14 A pínki musu à yenyī kū àdi yā pìnō kakara swáswa daáwa.

15 À tó aafia kū à bò Kirisi kīnaa kí ble á swèe gūn, zaakū kunna kū kōo aafiaan Luda á sísia mēdokōnōdenō ũ. Àgō Luda sáabu kpá.

16 À tó Kirisi yā vuteki le á nèsen manamana. À yā dakōne, à lé dakōa kū ōndō sīnda pínkiō.

Sáabukpanaa gŭn à lè sí Ludanɛ á swɛɛ gŭn kŭ zaburao kŭ tɔkpanaa kŭ donyĩ lè nɔ.

<sup>17</sup> Pó kŭ áten ke ke kŭ áten o pínki, à ke kŭ Dikiri Yesu tóo, à De Luda sáabu kpá a gáí.

*Luda gbɛnɔ kunna kŭ kɔo*

<sup>18</sup> Ákɔnɔ nɔgbɛnɔ, á baadi gɔ mì natɛ a zâne. Len à kŭ à ke Dikiri gŭn le.

<sup>19</sup> Gɔgbɛnɔ, á baadi gɔ ye a nanɔi. Àsungɔ pásĩ kŭńworo.

<sup>20</sup> Nénɔ, à á de kŭ á dao yá ma yá sĭnda pínki gŭn, zaakŭ abire mé àdi ká Dikirigu.

<sup>21</sup> Denɔ, àsun á nénɔ nɛsɛ futɛ à n pɔ yakaro.

<sup>22</sup> Zònɔ sɔ à á andunia dikirinɔ yá ma yá sĭnda pínki gŭn. Àsun zĩ keńne n wé yáiro. À zĩ keńne kŭ nɛsɛ mèn doo, zaakŭ Dikiri vĭnakerinɔn á ũ.

<sup>23</sup> Yá kŭ áten ke pínki, àgɔ ke kŭ yápurao, lándɔ Dikirin áten kenɛ bà, adi ke bisásirinlo.

<sup>24</sup> Àgɔ dɔ kŭ áni Dikiri láada le á baka ũ. Dikiri Kirisin áten doi.

<sup>25</sup> Yávánikeri ni a vāni gbè le. Luda di gbēke wé gwaro.

## 4

<sup>1</sup> Ákɔnɔ dikirinɔ, à á zònɔ gwa a zéa súsu. Àgɔ dɔ kŭ ákɔnɔ se á Dikiri vĭ musu.

<sup>2</sup> À á zĭda kpá aduakɛnaaa kŭ itɛkɛnaao kŭ sáabukpanaa.

<sup>3</sup> À wé kɛwɛɛ Ludaa dɔ, à zé bowɛɛ ò a yá waazi ke, ò Kiri si asiriyá ońne. Abire yáin ò ma dai kpésiran.

<sup>4</sup> À wé kemɛnɛ mà yá pì o swáswa, lákŭ à kŭ mà o nà.

<sup>5</sup> Àgõ á zĩda kũna dõ Yesusaridenŏ té kũ ãndõo. Àgõ yã kũ Luda a zé bõáre ke a gɔɔa.

<sup>6</sup> À tó á légbɛ gõ nna àgõ karana vĩ, de àgõ dõ lákũ áni yã lí baadia nà.

### *Lézammanaa*

<sup>7</sup> Ó gbɛ yenyĩde Tikiku ni ma baaru kpááre pínki. Àkũmɛ zĩkeri náanide ũ, ó zòbleri dakemɛ Dikiri zĩ gũn.

<sup>8</sup> Abire yãimɛ mateni a zĩáwa de à ó kunna oáre, à laakari le à kpáte.

<sup>9</sup> Á gbɛndo Ŋnesimu, ó gbɛ yenyĩde náanide ten su kãao. Oni pó kũ ó kú a gũn gu dia oáre pínki.

<sup>10</sup> Arisitaku kũ ó kú lele kpésiran fɔ kpàáwa kũ Baanaba dakũna Maakuo. Ò Maaku yã òáre kò. Tó à sù á kĩnaa, à gbãnake kpáne.

<sup>11</sup> Yesu kũ òdi pine Yusutu fɔ kpàáwa dɔ. Yuda kũ óten kpata kũ à bò Luda kĩnaa zĩ ke leleno lén gwe. Ma laakari kpatena kũńwo.

<sup>12</sup> Á gbɛndo Epafara, Kirisi Yesu zòbleri fɔ kpàáwa. Àdigõ ania ke kũ aduakenaáreo gɔɔ sĩnda pínki, de à le à kàsara kú àgõ papana Luda pɔyenyĩnaa gũn.

<sup>13</sup> Mani fɔ mà a sèeda ke kũ àten zĩ keáre manamana, ákõnŏ kũ Laodiseadenŏ kũ Iɛrapolidenŏ.

<sup>14</sup> Ó likita yenyĩde Luku kũ Demasio fɔ kpàáwa.

<sup>15</sup> À fɔ kpá ó gbɛ kũ ò kú Laodiseanŏa kũ Nimfao kũ sɔsi gbɛ kũ òdi kɔ kakara a beanŏ.

<sup>16</sup> Tó a takada dí kyó kè, à kpá Laodisea sɔsi gbɛnŏa ò a kyó ke, gbasa à n pó kyó ke se.

<sup>17</sup> À o Akipunɛ, à laakari dɔ Dikiri zĩ kũ ò dãnɛɛa, à a mì dɛ.



18 Makū Pɔlu makū mé ma yã dí kě kũ ma zĩda ɔɔ,  
ma fɔ kpàáwa. À tó ma kunna kpésiran yã gɔ̃ dɔ́águ.  
Luda gbêke keáre.

**Luda yá takada kú Bisá yáo**  
**Portions of the Holy Bible in the Busa language of**  
**Nigeria**

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

---

PDF generated using Haiola and XeLaTeX on 18 Apr 2025 from source files dated 31 Aug 2023

8631d380-7d17-5581-abf9-174814e8ccc3